



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Sumáriu Kazu
Tribunál Distritál Baucau
Edisaun Novembru 2018

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Baucau

1. Totál kazu ne'ebé JSMP monitoriza: 33

Artigu	Tipu Kazu	Númeru
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	19
Artigu 154 (KP)	Maus tratus ba kónjuje	5
Artigu 145 (KP)	Ofensa ba integridade fízika simples	1
Artigu 146 (KP)	Ofensa ba integridade fízika grave	1
Artigu 258 (KP)	Danu simples	2
Artigu 207 (KP)	Kondusaun sen karta	1

Artigu 257 (KP)	Abuzu konfiansa agravadu	1
Artigu 252 (KP)	Furtu agravadu	1
Artigu 145&258 (KP)	Ofensa ba integridade fízika simples no Danu simples	1
Artigu 146 (KP)	Ofensa ba integridade fízika grave	1
Totál		33

2. Totál desizaun ne'ebé JSMP monitoriza: 27

Tipu desizaun	Númeru
Suspensaun ba prizaun nia ezekusaun (artigu 68 KP)	20
Pena multa (artigu 67 KP)	4
Omologa pedidu dezisténsia keixa	2
Absolve	1
Totál	27

3. Totál kazu ne'ebé sei kontinua prosesu tuir JSMP nia monitorizasaun: 6

B. Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu : 0019/18. VQWCB
 Kompozisaun Tribunál : Singulár
 Juis : Dr. Jose Quintão
 Prokuradór : Dr. Domingos Goveia Barreto
 Defeza : Dr. Antonio Fernandes
 Tipu pena : Pena multa

Iha 5 Novembru 2018, Tribunál Distritál Baucau liuhosi tribunál movel iha Distritu Viqueque prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JdS hasoru nia aman, iha Distritu Viqueque.

Akuzasaun Prokuradór

Prokuradór akuza katak iha 24 Abril 2018, tuku 14.00 lokraik, arguidu bolu nia subriña atu han maibé subriña lakohi nune'e arguidu siak no hakilar maka'as. Tanba ne'e lezadu hase arguidu katak "*labele hirus labarik.*" Arguidu la simu lezadu nia liafuan ne'e, arguidu kaer iha lezadu nia kanuruk no riba lezadu ba rai no rezulta lezadu sofre moras no bubu iha lezadu nia kanuruk. Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu arguidu konfesa fikus hotu iha akuzasaun. Arguidu deklara katak depoisde akontesimentu ne'e arguidu rasik husu deskulpa ba lezadu ne'ebé nu'udar arguidu nia aman rasik. Arguidu deklara liután katak foin primeiravés mai hatan iha tribunál, arrepende ona nia hahalok, diak malu ona ho lezadu no promete sei la komete tan krime iha futuro. Arguidu servisu nu'udar badaen uma kada fulan tolu mak foin bele hetan osan US\$500.00. Iha parte seluk lezadu konfirma faktus hotu iha akuzasaun no lezadu deklara tan katak depoisde akontesimentu ne'e, wainhira arguidu fila hosi sela polísia arguidu rasik husu fali deskulpa ba lezadu no di'ak malu to'o agora.

Alegasaun finál

Prokuradór konsidera arguidu komete duni krime tuir faktu sira iha akuzasaun bazeia ba konfisaun arguidu nian no deklarasaun hosi lezadu. Konsidera katak arguidu iha kapasidade ekonomia, nune'e husu ba tribunál aplika pena multa ba arguidu.

Iha parte seluk defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no di'ak malu ona ho lezadu. Tanba ne'e husu ba tribunál atu aplika pena ne'ebé adekuaudu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba provas sira ne'e, tribunál kondena arguidu ho pena multa US\$30.00 ne'ebé sei selu US\$ 1.00 kada loron durante loron 30. Tribunál mós fiksa pena alternativa durante loron 20 prizaun, wainhira arguidu la kumpri pena multa refere.

2. Krime ofensa ba integridade fízika simples ho natureza violénsia doméstika

Nú. Prosesu

: 0023/18. VQSIC

Kompozisaun Tribunál : Singular
Juis : Dr. Jose Escurial
Prokuradór : Dr. Domingos Goveia Barreto
Defeza : Dr. Jose M. Guterres
Tipu pena : Pena prizaun fulan 6 suspende ba tinan 1

Iha 5 Novembru 2018, Tribunál Distritál Baucau liuhosi tribunál movel iha Distritu Viqueque prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EAC hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 1 Jullu 2018, tuku 20.00 kalan, lezada husu ba arguidu atu ko'us sira nia oan ne'ebé foin fulan neen. Maibé arguidu lakohi, nune'e sira diskute malu no arguidu basa dala barak iha lezada nia ulun no tuku dala barak iha lezada nia kotuk laran.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho nia moldura penál too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu, arguidu konfesa faktus hotu iha akuzasaun. Arguidu mós deklara katak depoisde akontesimentu ne'e liu semana ida arguidu rasik fó hatene família hodi rezolve arguidu ho lezada nia problema no to'o agora moris hamutuk nafatin nu'udar feen laen. Arguidu deklara katak arrepende ona nia hahalok, foin primeiravés mai hatan iha tribunál. Iha parte seluk lezada konfirma faktus hotu iha akuzasaun no deklara katak di'ak malu ona ho arguidu.

Alegasaun finál

Prokuradór mantein akuzasaun no konsidera arguidu provadu komete krime hasoru lezada. Tanba ne'e husu ba tribunál aplika pena prizaun fulan tolu suspende ba tinan ida.

Enkuantu defeza haktuir katak arguidu konfesa, arrepende ona nia hahalok, foin primeiravés mai hatan iha tribunál, arguidu ho iniciativa rasik buka família sira hodi rezolve sira ninia problema. Tanba ne'e husu ba Tribunál fó pena ne'ebé justu ba arguidu.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

3. Krime ofensa ba integridade fízika simples ho natureza violénsia doméstika

Nú. Prosesu : 0065/18.BCBCV
Kompozisaun Tribunál : Singulár
Juis : Dr. Jose Goncalves
Prokuradór : Dr. Gustavo M. da Silva
Defeza : Dr. Sidonio M. Sarmento
Tipu pena : Pena prizaun fulan 8 suspende ba tinan 1 fulan 6 ho regra ba konduta

Iha 5 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MCP hasoru nia feen, iha Distritu Baucau.

Akuzasaun prokuradór

Prokuradór akuza katak iha 10 Abril 2018, tuku 10.00 dader, arguidu tuku dala ida iha lezada nian tilun parte karuk no tuku dala ida iha lezada nia kotuk laran. Arguidu kontinua tuku dala ida iha lezada nia hirus matan no basa dala rua iha lezada nia hasan parte karuk no loos. Aktu hirak-ne'e rezulta lezada sofre moras iha tilun, bubu iha kotuk laran no dada-iis ladiak.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu arguidu konfesa integralmente ba faktus hotu iha akuzasaun. Arguidu deklara katak depoisde akontesimentu ne'e lezada ba hela tiha iha uma mahon durante loron tolu no arguidu mak ba bolu fali lezada hodi fila ba uma. Liután arguidu deklara katak arrepende ona nia hahalok no di'ak malu ona ho lezada. Iha parte seluk lezada konfirma faktus hotu iha akuzasaun no deklara katak di'ak malu ona ho arguidu.

Alegasaun finál

Prokuradór mantein faktu sira iha akuzasaun no husu ba tribunál atu kondena arguidu tuir konviksaun tribunál nian. Prokuradór konsidera katak arguidu provadu komete krime hasoru lezada bazeia ba konfisaun arguidu nian no deklarasaun lezada nian.

Enkuantu, defeza husu ba tribunál atu fó pena ne'ebé kamaan ba arguidu, tanba haree ba sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguida komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, di'ak malu ona ho lezada no foin primeiravés mai hatan

iha tribunál, husu ba tribunál kondena arguidu ho pena prizaun fulan ualu suspende ba tinan ida fulan neen no apresenta aan periódikamente iha tribunál kada fulan dala ida durante fulan ualu.

4. Krime ofensa ba integridade física simples ho natureza violência doméstica

Nú. Prosesu : 0003/18.VQOSU
Kompozisaun Tribunál : Singulár
Juis : Dr. Jose Goncalves
Prokuradór : Dr. Gustavo M. da Silva
Defeza : Dr. Gregorio de Lima
Tipu pena : Pena prizaun tinan 1 suspende ba tinan 1

Iha 5 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu MC hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 21 Janeiru 2018, iha tuku 17.38 lokraik, arguidu, lezada ho sira nia oan fetu fila hosi Baucau to'o iha Ossu sira lao ain de'it hodi ba sira nia hela fatin Lia-ruka, bainhira sira lao arguidu ho lezada konversa hele. Derepente arguidu kaer lezada nia faru gola hodi riba lezada ba iha rai, tuku dala rua iha lezada nia kotuk laran, tebe dala ida iha lezada nia kabun no tebe dala rua iha lezada nian kidan parte karuk no loos.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu hili direitu nonok. Iha parte seluk lezada konfirma faktus hotu iha akuzasaun no deklar katak di'ak malu ona ho arguidu. Testemuña NG nu'udar arguidu ho lezada nian oan depoimenta katak iha akontesimentu ne'e testemuña lao duni ho arguidu no lezada, maibé derepente de'it arguidu komete ona aktu sira ne'e hasoru lezada.

Alegasaun final

Prokuradór konsidera mezmú arguidu hili direitu nonok, arguidu provadu komete krime hasoru lezada, tanba lezada no testemuña konfirma faktus hotu iha akuzasaun. Tanba ne'e husu ba tribunál kondena arguidu tuir konviksaun tribunál nian.

Defeza mós haktuir katak iha produsaun prova arguidu hili direitu nonok, maibé lezada no testemuña konfirma faktus hotu. Tanba ne'e husu ba tribunál atu aplika pena ne'ebé adekua ba arguidu.

Desizaun

Depoisde avalia faktu hotu, tribunál prova katak arguida komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun tinan ida suspende ba tinan ida.

5. Krime ofensa ba integridade fizika simples ho natureza violénsia doméstika

Nú. Prosesu	: 0010/18.VQSIC
Kompozisaun Tribunál	: Singulár
Juis	: Dr. Jose Goncalves
Prokuradór	: Dr. Gustavo M. da Silva
Defeza	: Dr. Antonio Fernandes
Tipu pena	: Pena prizaun fulan 3 suspende ba tinan 1

Iha 5 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu DSX hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 4 Marsu 2018, tuku 13.00 lokraik, arguidu ho lezada diskute malu kona-ba lia mate, nune'e arguidu kaer lezada nian fuuk hodi bobar iha arguidu nian liman no riba lezada ba rai. Aktu ne'e rezulta lezada sofre moras no bubu iha lezada nia matan fukun. Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa fikus hotu iha akuzasaun, arguidu deklara katak durante moris hamutuk foin primeiravés mai hatan iha tribunál. Arguidu hatutan katak nia arrepende ona ninia hahalok, di'ak malu ona ho lezada no promete sei la komete tan krime hanesan hasoru lezada iha futuro. Iha parte seluk lezada konfirma faktus hotu iha akuzasaun no deklara katak di'ak malu ona ho arguidu.

Prokuradór haktuir katak bazeia ba konfisaun arguidu no deklarasaun lezada nian hatudu katak arguidu provadu komete krime hasoru lezada. Tanba ne'e prokuradór mantein nia akuzasaun no husu ba tribunál atu kondena arguidu ho pena multa.

Iha parte seluk defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no di'ak malu ona ho lezada. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoizde avalia faktu hotu, tribunál prova katak arguida komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, di'ak malu ona ho lezada no foin primeiravés mai hatan iha tribunál, tribunál kondena arguidu ho pena prizaun fulan tolu suspende ba tinan ida.

6. Krime ofensa ba integridade fizika simples

Nú. Prosesu	: 0034/16. VQSIC
Kompozisaun Tribunál	: Singular
Juis	: Dr. Antonio Fonseca
Prokuradór	: Dr. Luis H. Rangel da Cruz
Defeza	: Dr. Jose M. Guterres
Tipu pena	: Pena prizaun fulan 9 suspende ba tinan 1

Iha 6 Novembru 2018, Tribunál Distritál Baucau liuhosi tribunál movel iha Distritu Viqueque prezide julgamentu leitura sentensa ba krime ofensa ba integridade fizika simples ne'ebé envolve arguida Paulina Sarmiento hasoru nia banin fetu, iha Aldeia Darabai, Suku Matahoi, Sub-distritu Watulari, Distritu Viqueque.

Akuzasaun Prokuradór

Prokuradór akuza katak iha 27 Maiu 2017, tuku 7.00 dader, arguida tuku dala tolu iha lezada nia ibun, tuku dala ida iha lezada nia hasan parte karuk, kaer lezada nia fu'uk hodi dulas ba mai. Arguida kontinua tuku dala haat iha lezada nia ulun no tuku dala ida iha lezada nia kanuruk. Kazu ne'e akontese, bainhira arguida hirus nia laen, tanba sira nia uma aat, maibé nia laen laiha uma. Arguida ba husu ba lezada, tanba arguida hanoin nia laen iha lezada nia uma, sira komesa diskute malu no arguida komete aktu ne'e hasoru lezada.

Prokuradór akuza arguida kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa.

Produsaun ba prova sira

Iha prosesu julgamentu, arguida konfesa integralmente ba faktus hotu iha akuzasaun. Arguida deklara katak foin primeiravés mai hatan iha tribunál, arrepende ona nia hahalok. Arguida mós hakarak atu di'ak malu fali ho lezada, maibé lezada mak lakohi. Iha parte seluk lezada konfirma faktus hotu iha akuzasaun.

Alegasaun final

Prokuradór konsidera arguida provadu komete krime hasoru lezada, bazeia ba konfisaun arguida nian no deklarasaun hosi lezada. Tanba ne'e husu ba tribunál atu kondena arguida ho pena prizaun fulan tolu suspende ba tinan ida.

Enkuantu, defeza husu ba tribunál atu aplika pena ne'ebé adekuadu ba arguida ho konsiderasaun sira katak, arguida konfesa, arrepende ona nia hahalok no hakarak di'ak malu fali ho lezada, maibé lezada mak lakohi.

Desizaun

Depoisde avalia faktu provadu sira ne'ebé prodús durante julgamentu, tribunál konsidera akuzasaun prokuradór nian provadu. Bazeia ba faktus provadu sira ne'e no sirkunstánsia atenuante sira hanesan arguida konfesa, arrepende ona nia hahalok, tribunál konklui prosesu ne'e no kondena arguida ho pena prizaun fulan sia suspende ba tinan ida.

7. Krime ofensa ba integridade fizika simples ho natureza violénsia doméstika

Nú. Prosesu	: 0013/18. VQWTL
Kompozisaun Tribunál	: Singulár
Juis	: Dr. Antonio Fonseca
Prokuradór	: Dr. Gustavo M. Da Silva
Defeza	: Dr. Jose M. Guterres
Tipu pena	: Pena prizaun fulan 3 suspende ba tinan 1 no regra ba konduta

Iha 6 Novembru 2018, Tribunál Distritál Baucau liuhosi tribunál movel iha Distritu Viqueque prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PC hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 16 Maiu 2018, tuku 11.30 dader, arguidu ho lezada diskute malu, wainhira labarik tanis no lezada bolu arguidu atu ko'us labarik ne'ebé tanis iha kuartu laran. Maibé arguidu la rona nune'e lezada tama ba kuartu laran kous labarik arguidu tama tuir lezada ba kuartu laran no diskute malu ho lezada no tuku dala ida iha lezada nia inus no rezulta lezada sofre kanek no ran.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa.

Produsaun ba prova sira

Iha prosesu julgamentu, arguidu konfesa fakus hotu iha akuzasaun, arguidu deklarata katak depoisde akontesimentu liu tiha loron rua arguidu rasik di'ak malu fali ho lezada. Arguidu foin primeiravés mai hatan iha tribunál, arrepende ona nia hahalok, di'ak malu ona ho lezada no

promete sei la komete tan krime hanesan hasoru lezada iha futuru. Iha parte seluk lezada konfirma faktus hotu iha akuzasaun no deklarasaun katak di'ak malu ona ho arguidu.

Alegasaun final

Prokurador haktuir katak bazeia ba konfisaun arguidu no deklarasaun lezada nian hatudu katak arguidu provadu komete krime hasoru lezada. Tanba ne'e prokurador mantein nia akuzasaun no husu ba tribunál atu kondena arguidu ho pena prizaun fulan haat suspende ba tinan ida.

Iha parte seluk defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no di'ak malu ona ho lezada. Tanba ne'e husu ba tribunál atu aplika pena ne'ebé adekua ba arguidu.

Desizaun

Tribunál prova katak arguida komete duni krime tuir faktus sira iha akuzasaun. Bazeia ba faktus provadu sira ne'e no sirkunstansia atenuante sira hanesan arguidu konfesa, arrepende ona ninia hahalok, di'ak malu ona ho lezada no foin primeiravés mai hatan iha tribunál, tribunál kondena arguidu ho pena prizaun fulan tolu suspende ba tinan ida no apresenta-an periódikamente iha tribunál kada fulan dala ida duarante fulan tolu.

8. Maus tratus ba kónjuje

Nú. Prosesu	: 0033/16.BCBCV
Kompozisaun Tribunál	: Koletivu
Juis	: Dr. Jose Gonçalves : Dra. Ersilia de Jesus : Dr. Jose Escorial
Prokurador	: Dra. Ivonia M. Guterres
Defeza	: Dr. Gregorio de Lima
Tipu pena	: Pena prizaun tinan 2 suspende ba tinan 2 fulan 6

Iha 6 Novembru 2018, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu FSX hasoru nia feen, iha Distritu Baucau.

Akuzasaun Prokurador

Prokurador akuza katak iha 1 Juñu 2016, arguidu ho lezada diskute malu kona-ba arguidu haruka lezada atu dehan ba viziñu atu para ke'e rai iha arguidu ho lezada sira nia to'os laran. Lezada ba dehan duni, maibé sira nia viziñu nafatin ke'e. Nune'e Lezada fila ba uma no informa fali ba arguidu no arguidu obriga lezada atu ba fó hatene tan. Maibé lezada hatan ba arguidu dehan "*ó mane nusa la ba halo impedementu haruka fali hau feto mak ba.*" Hafoin arguidu foti katana taa iha lezada nia ain-tuur parte loos. Arguidu kontinua taa iha lezada nia ain-tuur okos. Aktu ne'e rezulta lezada sofre kanek iha lezada ain-tuur no ain-tuur okos no lezada nia liman fuan klaran mós kanek, tanba lezada hadau katana hosi arguidu.

Antes ne'e, iha 4 Maiu 2016, arguidu ho lezada diskute malu kona-ba arguidu deskonfia lezada amante ho mane seluk, nune'e arguidu tuku dala ida iha lezada nia kabaas no no lori tijora ko'a lezada nian liman kabun. Agresaun ne'e rezulta lezada sofre kanek no ran iha lezada nia liman kabun.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal too tinan 2 to'o tinan 6 no konjuga ho artigu 2, 3, 35 no artigu 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu deklara katak arrepende ona nia hahalok no foin primeiravés mai hatan iha Tribunál. Iha parte seluk lezada konfirma faktus hotu iha akuzasaun, lezada mós deklara katak iha akontesimentu ne'e lezada konsege baixa semana rua iha Ospital Regional Baucau no wainhira lezada alta hosi ospital lezada deside moris separa hosi arguidu to'o agora.

Alegasaun finál

Prokuradór haktuir katak bazeia ba produsaun prova arguidu provadu komete krime maus tratus hasoru no lezada diside hodi moris separa hosi arguidu tanba sempre halo agresaun hasoru lezada. Tanba ne'e husu ba tribunál atu kondena arguidu ho pena prizaun tinan rua suspende ba tinan tolu.

Enkuantu defeza haktuir katak arguidu konfesa faktus hotu iha akuzasaun, arguidu hakarak di'ak malu fali ho lezada, maibé lezada mak lakohi, arrepende ona nia hahalok no foin primeiravés mai hatan iha tribunal. Tanba ne'e husu ba tribunál aplika pena ne'ebé adekua ba arguidu.

Desizaun

Tribunál prova katak arguidu provadu komete krime hasoru lezada. Bazeia ba faktu provadu hirak ne'e no sirkunstánsia atenuante sira hotu hanesan arguidu konfesa, arrepende ona nia hahalok, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua fulan neen no selu kustu judisiál US\$ 20.00.

9. Krime ofensa ba integridade fizika simples no danu simples

Nú. Prosesu	: 0004/18. VQWTL
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Luis H. Rangel da Cruz
Defeza	: Dr. Antonio Fernandes
Tipu pena	: Omologa pedidu dezisténsia keixa

Iha 7 Novembru 2018, Tribunál Distritál Baucau liuhosi tribunál movel iha Distritu Viqueque prezide julgamentu tentativa konsiliaun ba krime ofensa ba integridade fizika simples ne'ebé envolve arguidu Pedro Soares Perreira hasoru lezada Saturnina A. da Silva, iha Aldeia Inabobo Suku Matahoi, Sub-distritu Watulari, Distritu Viqueque.

Akuzasaun Prokuradór

Prokurador akuza katak 5 Janeiru 2018, tuku 08.00 dader, arguidu kaer iha lezada nia liman karuk no rasta lezada to'o monu ba rai, arguidu mós rasta kotu lezada nia karteira no lezada nia sinelus. Kazu ne'e akontese bainhira arguidu monta estaka iha lezada nia rai no lezada ba hasai tiha estaka refere, tanba ne'e arguidu la satisfas ho lezada hodi halo agresaun hirak ne'e hasoru lezada.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho moldura penál too tinan 3 ka multa no artigu 258 Kódigu Penál kona-ba krime danu simples ho moldura penál too tinan 3 ka multa.

Prodúsaun ba prova sira

Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu prodúsaun ba prova, juis husu atu halo tentativa konsiliaun ba arguidu no lezada

Iha prosesu konsilisaun ne'e, arguidu husu deskulpa ba lezada no hakarak di'ak malu fali ho lezada, arguidu mós deklara katak arrepende ona nia hahalok no promete sei la komete tan krime hanesan. Lezada konkorda ho pedidu ne'e no husu ba tribunál atu dezisté ninia-keixa hasoru arguidu.

Alegasaun finál

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezada, tribunál konklui prosesu ne'e no omologa akordu dame entre parte sira.

10. Krime ofensa ba integridade fizika simples ho natureza violénsia doméstika

Nú. Prosesu	: 0032/17. VQWTL
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Luis H. Rangel da Cruz
Defeza	: Dr. Antonio Fernandes
Tipu pena	: Pena prizaun tinan 1 suspende ba tinan 2

Iha 7 Novembru 2018, Tribunál Distritál Baucau liuhosi tribunál movel iha Distritu Viqueque prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu OA hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 20 Dezembru 2017, tuku 21.00 kalan, arguidu ho lezada diskute malu kona-ba arguidu fa'an hare hamutuk lata haat nulu resin lima, asu ida no manu ida no osan hosi faan sasan sira ne'e arguidu la fó ba lezada. Hafoin diskute-malu arguidu tuku dala rua iha lezada nia tilun hun parte loos, kaer lezada riba ba rai to'o dismaia, maibé arguidu tebe tan dala ida iha lezada nia kotuk laran no kaer lezada nia liman dada ba mai.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penál too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktus hotu iha akuzasaun. Arguidu deklara katak foin primeiravés mai hatan iha tribunál, arrepende ona nia hahalok no diak malu ona ho lezada. Iha parte seluk lezada konfirma faktus hotu iha akuzasaun no deklara katak diak malu ona ho arguidu.

Alegasaun finál

Prokuradór mantein nia akuzasaun no husu ba tribunál atu kondena arguidu ho pena prizaun fulan neen suspende ba tinan rua, tanba konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada.

Enkuantu, defeza husu ba tribunál atu fó pena ne'ebé adekua ba arguidu, tanba haree ba sirkunstánsia atenuante sira hanesan arguidu konfesa, arrepende ona nia hahalok diak malu ona ho lezada no foin primeiravés mai hatan iha tribunál.

Desizaun

Depoizde avalia faktu sira hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, tribunál konklui prosesu ne'e no kondena arguidu ho pena prizaun tinan ida suspende ba tinan rua.

11. Krime maus tratus ba kónjuje

Nú. Prosesu : 0019/18. PDBAU
Kompozisaun Tribunál : Kolekivu
Juis : Dra. Ersilia de Jesus
; Dr. Jose Goncalves
:Dr. Jose Escurial
Prokuradór : Dr. Luis H. Rangel da Cruz
Defeza : Dr. Gregorio de Lima
Tipu pena : Pena prizaun tinan 2 suspende ba tinan 2

Iha 8 Novembru 2018, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebe envolve arguidu IS hasoru nia feen, iha Distritu Manatuto.

Akuzasaun Prokuradór

Prokuradór akuza katak iha 29 Jullu 2017, arguidu ho lezada diskute malu no arguidu tolok lezada, nune'e lezada halai sai hosi uma no ba hela tiha iha lezada nia subriña nia uma.

Antes iha ne'e iha tinan 2013, arguidu ho lezada diskute malu kona-ba arguidu deskonfia lezada iha relasaun amante ho mane seluk, nune'e arguidu tuku dala ida iha lezada nian ibun no rezulta lezada sofre kanek no ran iha lezada nia ibun. Arguidu mós sempre halo agresaun hasoru lezada no arguidu duni lezada ba hela iha lezada nia inan aman nia uma.

Iha data no fulan ne'ebé la apuradu, maibé iha tinan 2008, arguidu halo agresaun dala barak hasoru lezada, no lori ai dona baku dala ida iha lezada nia kotuk laran no duni lezada ho katana.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 to'o tinan 6 no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu deklarata katak kona-ba faktus ne'ebé akontese iha tinan 2008, arguidu la tolok lezada no duni lezada ho ai dona, arguidu mós la baku lezada no la uza katana duni lezada. Enkuantu kona-ba faktus ne'ebé akontese iha tinan 2013, arguidu ho lezada diskute malu kona-ba lezada faan ai mebel nian la fó hatene ba arguidu no lezada dun arguidu gasta osan arbiru, nune'e arguidu basa dala rua iha lezada nia hasan.

Ba faktus ne'ebé akontese iha 29 Jullu 2017, arguidu deklarata katak arguidu ho lezada diskute malu, no lezada halai ba hela iha subriña nia uma. Arguidu ba dala sanulu resin ida atu rezolve problema ne'e, maibé lezada mak lakohi. Arguidu arrende ona nia hahalok no foin primeiravés mai hatan iha tribunál.

Iha parte seluk lezada konfirma faktus hotu iha akuzasaun no deklarata katak hakarak separa ho arguidu, tanba arguidu sempre halo agresaun hasoru lezada.

Alegasaun final

Prokuradór konsidera arguidu provadu komete krime maus tratus hasoru nia kónjuje bazeia ba konfisaun arguidu nian no deklarasaun hosi lezada. Prokuradór hatutan liután katak tuir loloos lezada tenke hetan protesaun espesial hosi arguidu, maibé pela kontráriu arguidu maka halo fali tratamentu ladiak ba lezada to' o lezada hakarak moris separa ho arguidu. Tanba ne'e husu ba tribunál atu kondena arguidu ho pena prizaun efetiva.

Defeza haktuir katak arguidu deklara de'it faktus ne'ebé nia komete, arrepende ona nia hahalok no foin primeiravés mai hatan iha tribunál. Arguidu hakarak di'ak malu fali ho lezada maibé lezada mak lakohi. Tanba ne'e husu ba tribunál aplika pena ne'ebé adekuadu ba arguidu.

Desizaun

Depoide avalia faktu sira ne'ebé prodús durante julgamentu, tribunál konsidera arguidu provadu komete krime hasoru lezada. Bazeia ba faktus provadu sira ne'e, tribunál konklui prosesu ne'e no no kondena arguidu ho pena prizaun tinan rua suspende ba tinan rua no selu mós kustu judisiál US\$40.00.

12. Krime maus tratus ba kónjuje

Nu. Prosesu : 0049/17. PDBAU

Kompozisaun Tribunál : Kolektivu
Juis : Dr. Jose Goncalves Dra. Ersilia de Jesus
Dr. Afonso Carmona
Prokuradór : Dr. Luis H. Rangel da Cruz
Defeza : Dr. Grigorio de Lima
Tipu pena : Pena prizaun tinan 3 suspente ba tinan 3

Iha 8 Novembru 2018, Tribunál Distritál Baucau prezide julgamentu leitura akordaun ba kazu maus tratus ba kónjuje ne'ebé envolve arguidu RD hasoru nia feen, iha Distritu Baucau.

Akuzasaun prokuradór

Prokurador akuza katak iha 15 Marsu 2015, tuku 21.00 kalan, arguidu tuku dala rua iha lezada nian kabaas, tebe dala lima iha lezada nia kidan parte karuk no rezulta lezada sofre bubu no moras iha kabaas no kidan.

Antes ne'e iha data no fulan ne'ebé la apuradu, maibé iha tinan 2014, arguidu basa dala rua iha lezada nia hasan no buti dala ida iha lezada nia kakorok. Arguidu la'ós foin primeiravés komete krime hasoru lezada, tanba antes ne'e iha 2011, arguidu buti lezada nia kakorok no riba lezada ba rai no lezada nia alin mak mak sori netik.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 to' o tinan 6 no konjuga ho artigu 2, 3, 35 no artigu 36 LKVD.

Produsaun ba provas sira

Iha prosesu julgamentu, arguidu deklara katak iha 15 Marsu 2015, arguidu ho lezada diskute malu kona-ba ema telefone ba lezada nia telefone maibé lezada la foti telefone no lezada buti mate hela de'it. Nune'e arguidu husu lezada atu klarifika maibé lezada hatan katak pai boot mak telefone, wainhira arguidu chek fali númeru refere mane seluk nian. Arguidu deklara katak nia basa dala ida iha lezada nia hasan no la tuku tebe lezada. Liután arguidu deklara katak depoisde akontesimentu ne'e lezada sai hosi uma no la fó hatene arguidu. Durante moris hamutuk, foin primeiravés arguidu baku lezada, la'ós baku bei-beik lezada. Arguidu foin primeiravés mai hatan iha tribunál, no deklara katak arrepende ona nia hahalok. Arguidu buka ona lezada ho nia família atu diak malu, maibé lezada rejeita. Arguidu mak kontínu tau-matan ba sira nia oan nain rua no kada fulan arguidu fó osan US\$50.00. ba labarik sira liuhosi lezada.

Iha parte seluk lezada deklara katak, iha 2011 arguidu buti lezada nia kakorok no dada lezada nian fuuk no riba lezada ba rai no lezada nia alin mak sori netik. Lezada konfirma faktus hotu iha akuzasaun no deklara katak durante moris hamutuk arguidu sempre halo agresaun hasoru lezada.

Testemuña SE ne'ebé nu'udar lezada nia alin konfirma faktus hotu iha akuzasaun no deklara mós katak, durante hela hamutuk arguidu sempre halo agresaun hasoru lezada.

Alegasaun final

Prokuradór haktuir katak bazeia ba konfisaun arguidu nian no deklarasaun hosi lezada nian hatudu katak arguidu provadu komete krime hasoru nia kónjuje. Tanba ne'e prokuradór mantein nia akuzasaun no husu ba tribunál atu kondena arguidu ho pena prizaun tinan ida fulan neen suspende tinan tolu.

Defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no di'ak malu ona ho lezada. Tanba ne'e husu ba tribunál atu aplika pena ne'ebé adekuaudu ba arguidu.

Desizaun

Tribunál prova katak arguidu komete duni krime tuir faktus sira iha akuzasaun. Tribunál mós konsidera sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál, tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

13. Krime ofensa ba integridade física simples ho natureza violénsia doméstika

Nú. Prosesu	: 0094/17. BCBCV
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dr. Luis H. Rangel da Cruz
Defeza	: Dr. Sidonio M. Sarmiento
Tipu pena	: Pena prizaun fulan 6 suspende ba tinan 1 fulan 6.

Iha 9 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu SF hasoru nia feen, iha Distritu Baucau.

Akuzasaun Prokuradór

Prokuradór akuza katak iha 28 Novembru 2017, tuku 09.00 dader, lezada foin fila hosi merkadu arguidu husu osan ba lezada atu hola nia sigaru, maibé lezada hatan osan ohin hola hotu ona labarik nia roupa. Hafoin sira diskute-malu arguidu hirus no soe sai hotu lezada nia roupa. Bainhira lezada ba foti fali nia roupa, lezada ho arguidu hadau malu roupa no arguidu nia liman kukun kona iha lezada nia kakorok no rezulta lezada ninia kakorok kanek ki'ik.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa faktus hotu iha akuzasaun, arguidu di'ak malu ona ho lezada no agora hela hamutuk nu'udar feen ho laen, no desde kazu ne'e akontese to'o agora la baku ona lezada. Arguidu arrepende ona nia hahalok no foin primeiravés mai hatan iha tribunál.

Alegasaun finál

Prokuradór konsidera arguidu komete duni krime hasoru lezada no atu prevene arguidu repete tan krime hanesan iha futuru, husu ba tribunál atu kondena arguidu ho pena prizaun fulan 6 no suspende ba tinan 1.

Defeza argumenta katak arguidu konfesa, arrepende ona nia hahalok no promete sei la komete tan krime hanesan iha futuru. Tanba ne'e husu ba tribunál atu aplika pena ne'ebé adekuaudu ba arguidu.

Desizaun

Depoizde avalia faktu sira hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona nia hahalok, di'ak malu ona ho lezada no foin primeiravés mai hatan iha tribunál, tribunál konklui prosesu ne'e no kondena arguidu ho pena prizaun fulan nee suspende ba tinan ida fulan ne'e.

14. Krime danu simples

Nú. Prosesu : 0044/14.BCBCV

Kompozisaun Tribunál : Singulár
Juis : Dr. Jose Goncalves
Prokuradór : Dra. Ivonia M. Guterres
Defeza : Dr. Gregorio de Lima
Tipu pena : Omologa pedidu dezisténsia keixa

Iha 9 Novembru 2018, Tribunál Distritál Baucau prezide julgamentu leitura sentensa ba krime danu simples ne'ebé envolve arguidu Joao G. Belo, Domingos Pires, Julio C. Belo no Abreu Quintaõ Belo hasoru lezadu Alberto da Costa Pereira iha areia Uatu-lete, Suku Tirilolo, Distritu Baucau.

Akuzasaun prokuradór

Prokuradór akuza katak iha 21 Abril 2014, tuku 07.00 dader, lezadu hadia hela uma ne'ebé lezadu ho família hela ba tanba kondisaun ladiak ona. Derepente arguidu Joao G. Belo mosu mai haruka arguidu Domingos Pires, Julio C. Belo no Abreu Quintaõ Belo ho ai suak besi selok hotu kalen no ai hodi hatun hotu ba rai lezadu hela iha uma ne'e iha tinan 2011. Sasan sira ne'ebé arguidu estraga mak hanesan kalen, ai, pregu, piku/bebak, semente, rai-henek, selu transporte no sasan seluk ho valór osan hamutuk US\$1.048.00

Prokuradór akuza arguidu sira kontra artigu 258 Kódigu Penál kona-ba krime danu simples ho nia moldura penal to'o tinan 3 ka multa.

Produsaun ba prova sira

Iha prosesu julgamentu, arguidu sira konfesa faktus hotu iha akuzasaun. Arguidu sira hatutan liután katak arrepente ona sira nia hahalok, di'ak malu ona ho lezadu no fó ona indemnizasaun ba lezadu ho valór osan US\$450.00 no di'ak malu ona ho lezadu. Sira deklara katak foin primeiravés mai hatan iha tribunál no promete sei la komete tan krime hanesan hasoru lezadu iha futuro.

Iha parte seluk lezadu konfirma faktus hotu iha akuzasaun no deklara katak depoisde akontesimentu ne'e sira rezolve ona problema ne'e no arguidu sira fó ona osan US\$450.00 ba lezadu no lezadu mós simu ona no agora lezadu husu atu aumenta tan US\$500.00

Alegasaun finál

Prokuradór husu ba tribunál atu kondena arguidu sira ho pena prizaun tinan rua suspende ba tinan tolu no fó indemnizasaun ba lezadu ho valor osan US\$500.00. Prokuradór konsidera katak arguidu sira provadu estraga duni lezadu nia sasan ne'ebé la'oss partense ba arguidu sira.

Entretantu, defeza husu ba tribunál omologa parte sira nia akordu ne'ebé junta iha prosesu no

absolve arguidu sira hosi prosesu ne'e. tanba arguidu sira fó ona indemnizasaun ba lezadu sira valór osan US\$450.00.

Desizaun

Depoisde avalia faktu provadu sira ne'ebé prodús durante julgamentu, tribunál konsidera parte sira iha ona akordu dame nune'e tribunál omologa akordu dame entre parte sira.

15. Krime ofensa ba integridade física simples ho natureza violénsia doméstika

Nú. Prosesu	: 0014/18. BCLGA
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dra. Ivonia M. Guterres
Defeza	: Dr. Antonio Fernandes
Tipu pena	: Pena prizaun fulan 6 suspende ba tinan 1

Iha 13 Novembru 2018, Tribunál Distritál Baucau prezide julgamentu leitura sentensa ba krime ofensa ba integriade física simples ho natureza violénsia doméstika ne'ebé envolve arguidu EMB hasoru nia feen, iha Distritu Baucau.

Akuzasaun prokuradór

Prokuradór akuza katak iha 5 Juñu 2018, arguidu ho lezada diskute malu depoisde lezada ho nia oan fila hosi merkadu. Kuandu to'o iha uma lezada ko'us kedas sira nia oan no arguidu husu ba lezada atu arguidu ko'us fali. Maibé lezada lakohi husik labarik ba arguidu ko'us, nune'e arguidu tuku dala ida iha lezada nianibun no rezulta lezada sofre moras no bubu iha lezada niaibun.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha julgamentu arguidu konfesa faktus hotu iha akuzasaun, arguidu deklara katak arrepende ona nia hahalok, di'ak malu ona ho lezada no promete sei la komete tan krime hanesan hasoru lezada iha futuro.

Iha parte seluk lezada konfirma faktus hotu iha akuzasaun no deklara katak depoisde akontesimentu ne'e diak malu ona ho arguidu no to'o agora arguidu la baku ona lezada.

Alegasaun finál

Prokuradór konsidera arguidu provadu komete krime hasoru lezada, no kazu violénsia doméstika julga hela de'it iha tribunál. Atu prevene arguidu komete tan krime hanesan iha futuro, husu ba

tribunál atu kondena arguidu ho pena prizaun tinan ida fulan neen suspende ba tinan ida fulan neen.

Enkuantu defeza haktuir katak haree ba sirkunstánsia atenuante sira hanesan arguidu konfesa, arrepende ona nia hahalok, di'ak malu ona ho lezada no promete sei la komete tan krime hanesan iha futuru, husu ba tribunál atu aplika pena ne'ebé justu ba arguidu.

Desizaun

Depoizde avalia faktu provadu sira ne'ebé prodús durante julgamentu tribunál konsidera arguidu provadu komete krime hasoru lezada. Bazeia ba faktus provadu sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida.

16. Krime danu simples

Nú. Prosesu	: 0079/18. BCBCV
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Gustavo M. da Silva
Defeza	: Dr. Marçal Gama
Tipu pena	: Pena multa

Iha 14 Novembru 2018, Tribunál Distritál Baucau prezide julgamentu leitura sentensa ba krime danu simples ne'ebé envolve arguidu Augusto Norberto Marçal hasoru Donato Viana Silva, iha Suku Buibau, Sub-distriu Baucau Vila, Distritu Baucau.

Akuzasaun Prokuradór

Prokuradór akuza katak iha 31 Abril 2018, tuku 19.30 kalan, arguidu tebe rahun lezadu nia vidru janela nian hamutuk tolu. Kada vidru ida konverte ho folin US\$1.50 nune'e totál prejuizu hamutuk US\$4.50. Kazu ne'e akontese wainhira arguidu ho lezadu atu rezolve problema kona-ba arguidu ne'ebé diskonfia iha relasaun amante ho lezadu nia feen no lezadu husu atu bolu mós arguidu nia feen hanesan testemuña ba problema ne'e. Maibé arguidu lakohi, tanba ne'e arguidu ho lezadu diskute malu no arguidu komete aktu ne'e.

Prokuradór akuza arguidu kontra artigu 258 Kódigu Penál kona-ba krime danu simples ho nia moldura penal to'ó tinan 3 ka multa.

Produsaun ba prova sira

Iha prosesu julgamentu, arguidu nega faktus hotu iha akuzasaun no deklara katak lezadu mak telefone arguidu ba iha lezadu nia uma atu rezolve problema, maibé arguidu la hatene kona-ba problema ne'e. Derepente sein razaun ne'ebé klaru lezadu foti kadeira masa baku dala ida iha

arguidu nia liman no rezulta kanek no ran, nune'e arguidu halai sai hosi lezadu nia uma laran no rona vidru tarutu no monu. Arguidu mós deklara katak foin primeiravés mai hatan iha tribunál.

Iha parte seluk lezadu konfirma faktus hotu iha akuzasaun no deklara katak arguidu mak tebe rahun lezadu nia vidru janela nian.

Testemuña Jacinta da Silva nu'udar lezadu nia feen depoimenta katak iha akontesimentu ne'e arguidu, lezadu no testemuña de'it mak iha uma, lakleur testemuña rona arguidu ho lezadu diskute malu, nune'e testemuña halai ba haree arguidu tebe rahun ona vidru janela nian hamutuk tolu.

Alegasaun final

Prokuradór haktuir katak arguidu tenta atu bosok tribunál, maibé lezadu no testemuña konfirma faktus hotu iha akuzasaun, nune'e bazeia ba deklarasaun lezadu no testemuña nian prokuradór konsidera arguidu provadu komete krime danu simples. Tanba ne'e husu ba tribunál atu kondena arguidu ho pena multa.

Enkuantu defeza haktuir katak arguidu fó ninia justifikasaun katak la'os arguidu mak estraga lezadu nia vidru, nune'e defeza konsidera faktu sira ne'e la provadu no husu ba tribunál atu absolve arguidu hosi prosesu ne'e.

Desizaun

Depoizde avalia faktu ne'ebé prodús durante julgamentu tribunál konsidera arguidu provadu komete krime danu simples. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$30.00 ne'ebé sei selu US\$1.00 kada loron durante loron 30 no selu mós kustu judisiál US\$10.00. Tribunál mós fiksa pena alternativa durante loron 20 prizaun, wainhira arguidu la kumpri pena multa refere. Tribunál mós husu ba arguidu selu fali US\$5.00 hodi troka fali vidru ne'ebé rahun.

17. Krime ofensa ba integridade fizika simples ho natureza violénsia doméstika

Nu. Prosesu	: 0029/18.MNMNT
Kompozisaun Tribunál	: Singulár
Juis	: Dr. Antonio Fonseca
Prokuradór	: Dr. Gustavo Augusto M. da Silva
Defeza	: Dr. Jose M. Guterres
Tipu pena	: Pena prizaun fulan 6 suspende ba tinan 1 no regra ba konduta

Iha 14 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu DS hasoru nia feen, iha Distritu Manatuto.

Akuzasaun prokuradór

Prokuradór akuza katak iha loron no fulan ne'ebé la apuradu, maibé iha tinan 2018, arguidu ho lezada diskute malu kona-ba sira nia-ona ne'ebé tanis, nune'e arguidu baku dala ida iha lezada nia ulun, tuku dala ida iha lezada nian tilun-hun no tebe dala ida iha lezada nia kelen. Arguidu hakuak lezada no rezulta lezada no arguidu monu ba rai no lezada nian ibun kanek no liman fuan kanek tanba kona ba iha parede uma nian.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu, arguidu konfesa integralmente faktus hotu iha akuzasaun, arguidu deklarata katak hakuak lezada, tanba lezada kaer hela fatuk atu tuda arguidu. Durante moris hamutuk foin primeiravés mai hatan iha tribunál, arrepende ona nia hahalok, di'ak malu ona ho lezada no promete sei la komete tan krime hanesan hasoru lezada iha futuru.

Iha parte seluk lezada konfirma faktus hotu iha akuzasaun lezada deklarata katak depoisde akontesimentu ne'e lezada ba hela iha uma mahon durante semana tolu no arguidu mak bolu fali lezada fila ba sira nia uma no to'o agora arguidu la baku ona lezada.

Alrgasaun finál

Prokuradór husu ba tribunál atu aplika pena ba arguidu tuir konviksaun tribunál nian, tanba konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada.

Aleinde ne'e, parte defeza husu ba tribunál atu aplika pena ne'ebé adekuadu ba arguidu bazeia ba sirkunstánsia atenuante sira hanesan, arguidu konfesa, arrepende ona nia hahalok no foin primeiravés mai hatan iha tribunál.

Desizaun

Depoisde avalia faktu provadu sira ne'ebé prodús durante julgamentu, tribunál konsidera akuzasaun prokuradór nian provadu hotu. Tribunál konklui prosesu ne'e no kondena arguidu ho pena prizaun fulan neen suspende ba tinan ida no kondena arguidu atu apresenta aan periódikamente iha tribunál kada fulan dala ida durante fulan neen.

18. Krime ofensa ba integridade fizika simples ho natureza violénsia doméstika

Nú. Prosesu : 0010/18.BCSIC
Kompozisaun Tribunál : Singulár

Juis : Dr. Antonio Fonseca
Prokuradór : Dr. Gustavo M. da Silva
Defeza : Dr. Jose M. Guterres
Tipu pena : Pena prizaun fulan 5 suspende ba tinan 1no regra ba konduta

Iha 14 Novembru 2018, Tribunál Distritál Baucau prezide julgamentu leitura sentensa ba kazu ofensa ba integridade físiika simples ho natureza violénsia doméstika ne'ebé envolve arguida ASBM hasoru nia laen, iha Distritu Baucau.

Akuzasaun Prokuradór

Prokuradór akuza katak iha 12 Abril 2018, arguida lori ai-sanak baku dala ida iha lezada nia ulun no baku dala ida iha lezadu nia kotuk laran no rezulta lezadu sofre kanek iha lezadu nia ulun no moras no bubu iha lezada nia kotuk laran.

Prokuradór akuza arguida kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguida konfesa integralmente faktus hotu iha akuzasaun, arguida deklara katak depoisde akontesimentu arguida ho lezada di'ak malu fali, maibé liutiha fulan neen lezadu ne'ebé nu'udar sidadaun estranjeiru fila ona ba nia rai. Arguida mós deklara katak durante moris hamutuk foin primeiravés mai hatan iha tribunál no arrepende ona nia hahalok. Lezadu la marka prezensa iha julgamentu ne'e, tanba lezadu fila ona ba nia rai.

Alegasaun finál

Prokuradór konsidera arguida provadu komete krime hasoru lezadu bazeia ba konfisaun arguida nian, tanba ne'e husu ba tribunál atu kondena arguida tuir konviksaun tribunál nian.

Enkuantu defeza haktuir katak arguida konfesa faktus hotu iha akuzasaun, arrepende ona nia hahalok no foin primeiravés mai hatan iha tribunál. Aleinde ne'e arguida mak agora sustenta sira nia oan tanba lezadu fila ona ba nia rai. Tanba ne'e husu ba tribunál atu aplika pena ne'ebé adekua ba arguida.

Desizaun

Depoisde avalia faktus hotu, tribunál prova katak arguida komete duni krime tuir faktus sira iha akuzasaun. Bazeia ba faktus provadu sira ne'e no sirkunstánsia atenuante sira hanesan arguida konfesa, arrepende ona ninia hahalok, di'ak malu ona ho lezadu no foin primeiravés mai hatan iha tribunál, tribunál konklui prosesu ne'e no kondena arguida ho pena prizaun fulan lima

suspende ba tinan ida no selu mós kustu judisiál US\$10.00 no apresenta aan periódikamente iha tribunál kada fulan dala ida durante fulan lima.

19. Krime ofensa ba integridade fízika simples ho natureza violénsia doméstika

Nú. Prosesu : 0001/18.MNMNT
Kompozisaun Tribunál : Singulár
Juis : Dr. Jose Goncalves
Prokuradór : Dr. Gustavo M. da Silva
Defeza : Dr. Jose M. Guterres
Tipu pena : Pena multa

Iha 16 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FCdL hasoru nia feen, iha Distritu Manatuto.

Akuzasaun Prokuradór

Prokuradór akuza katak 1 Janeiru 2018, tuku 17.00 lokraik, arguidu ho lezada diskute malu tanba arguidu fila tarde ba uma. Lezada husu ba arguidu “*tanbasá mak fila tarde,*” no arguidu nonok de'it, nune'e lezada foti ai-manas ne'ebé de'ut ona no fakar ba arguidu. Maibé ai-manas ne'e la konsege kona, nune'e arguidu foti ai-sanak ida baku dala rua iha lezada nia ulun no foti kadeira ai ki'ik baku dala ida iha lezada nia ulun. Aktu ne'e rezulta lezada sofre kanek no ran sai barak no lezada konsege ba halo tratamentu iha sentru saúde no suku pontu hitu.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu, arguidu konfesa integralmente ba faktus hotu iha akuzasaun. Arguidu deklara katak antes ne'e mai ona tribunál ho krime ne'ebé hanesan hasoru lezada no tribunál kondena arguidu ba kazu uluk ho pena multa. Arguidu deklara katak arrepende ona nia hahalok no di'ak malu ona ho lezada. Iha parte seluk lezada konfirma faktus hotu iha akuzasaun, lezada mós deklara katak depoisde akontesimentu ne'e arguidu rasik di'ak malu fali ho lezada no to'o agora la baku ona lezada.

Alegasaun finál

Prokuradór mantein nia akuzasaun tanba konsidera arguidu provadu komete krime hasoru lezada no arguidu la hatudu ninia arrependementu. Antes ne'e arguidu iha ona antesidente kriminais no arguidu la hatudu ninia arrependimentu. Tanba ne'e husu ba tribunál atu kondena arguidu ho pena prizaun tinan 1 suspende ba tinan 2.

Enkuantu, defeza husu ba tribunál atu fó pena ne'ebé adekuaudu ba arguidu, tanba haree ba sirkunstánsia atenuante sira hanesan arguidu konfesa, arrepende ona nia hahalok no di'ak malu ona ho lezada.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$180.00 ne'ebé sei selu US\$2.00 kada loron durante loron 90 no selu kustu judisiál US\$20.00. Tribunál mós fiksa pena alternativa durante loron 60 prizaun, wainhira arguidu la kumpri pena multa refere.

20. Krime ofensa ba integridade fízika simples ho natureza violénsia doméstika

Nú. Prosesu	: 0014/18. BCEVN
Kompozisaun Tribunál	: Singulár
Juis	: Dr. Jose Quintão
Prokuradór	: Dr. Luis H. Rangel da Cruz
Defeza	: Dr. Jose M. Guterres
Tipu pena	: Pena multa

Iha 20 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FXGP hasoru nia nia feen, iha Distritu Baucau.

Akuzasaun Prokuradór

Prokuradór akuza katak iha 23 Agostu 2018, tuku 17.00 lokraik, arguidu ho lezada diskute malu kona-ba sira nia oan ne'ebé tanis, arguidu foti ai sanak ida baku dala ida iha lezada nia kidan sorin loos no baku dala ida iha lezada nia kelen loos. Aktu ne'e rezulta lezada sofre moras no bubu iha lezada nia kidan no kelen no lezada konsege ba halo tratamentu iha Sentru Saúde Venilale.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa fakus hotu iha akuzasaun, arguidu deklara katak durante moris hamutuk foin primeiravés mai hatan iha tribunál. Arguidu arrepende ona nia hahalok, diak malu ona ho lezada no promete sei la komete tan krime hanesan hasoru lezada iha futuro. Iha parte seluk lezada konfirma faktus hotu iha akuzasaun no deklara katak diak malu ona ho arguidu.

Alegasaun final

Prokuradór haktuir katak bazeia ba konfisaun arguidu nian no deklarasaun lezada nian hatudu katak arguidu provadu komete krime hasoru lezada. Tanba ne'e prokuradór mantain nia akuzasaun no husu ba tribunál atu kondena arguidu ho pena prizaun fulan tolu suspende ba tinan ida.

Iha parte seluk defeza haktuir katak arguidu konfesa, arrepende ona nia hahalok, foin primeiravés mai hatan iha tribunál no di'ak malu ona ho lezada. Tanba ne'e husu ba tribunál atu aplika pena ne'ebé adekuaudu ba arguidu.

Desizaun

Depoizde avalia faktus hotu, tribunál konsidera arguidu provadu komete krime hasoru lezada. Bazeia ba faktus provadu sira ne'e tribunál konklui prosesu ne'e no kondena arguidu ho pena multa US\$22.50 ne'ebé sei selu 0.50 sentavus kada loraun durante loraun 45. Tribunál mós fiksa pena alternativa durante loraun 30 prizaun, wainhira arguidu la kumpri pena multa refere.

21. Krime maus tratus ba kónjuje

Nú. Prosesu	: 0022/18. VQSIC
Kompozisaun Tribunál	: Koletivu
Juis	: Dr. Jose Escorial Dr. Hugo da Cruz Pui Dr. Jose Quintão
Prokuradór	: Dr. Domingos G. Barreto
Defeza	: Dr. Antonio Fernandes
Tipu pena	: Pena prizaun tina 2 suspende ba tinan 2

Iha 20 Novembru 2018, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu NP hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 27 Maiu 2018, arguidu ho lezada diskute malu, wainhira lezada haruka arguidu ko'us sira nia oan maibé arguidu lakohi hafoin arguidu tebe dala ida iha lezada nia kotuk laran.

Antes ne'e iha 28 Maiu 2018, tuku 19.00 lokraik, arguidu ho lezada diskute malu bainhira lezada ne'ebé ho kondisaun moras haruka arguidu fó haris labarik. Arguidu fó haris tiha labarik maibé labarik tanis, nune'e arguidu ho lezada kontinua diskute malu. Arguidu basa dala ida iha lezada nia hasan parte loos, tuku dala ida iha lezada nia kakorok parte loos no lori kadeira masa baku dala ida iha lezada nia reen-toos.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 to'o tinan 6.

Produsaun ba prova sira

Iha prosesu julgamentu, arguidu konfesa fikus hotu iha akuzasaun, arguidu mós deklarata katak depoisde arguidu fila hosi eskuadra polísia. Lezada lakohi moris hamutuk ona ho arguidu. Arguidu tenta atu rezolve fali problema ne'e, maibé lezada ho nia família mak lakohi. Liután arguidu deklarata katak foin primeiravés mai hatan iha tribunál, arrepende ona ninia hahalok no promete sei la komete tan krime iha futuro. Iha parte seluk lezada konfirma faktu hotu iha akuzasaun no deklarata katak lakohi moris hamutuk ona ho arguidu, tanba durante moris hamutuk arguidu sempre halo agresaun hasoru lezada.

Alegasaun finál

Prokuradór haktuir katak bazeia ba konfisaun arguidu nian no deklarasaun lezada nian hatudu katak arguidu provadu halo tratamentu ladiak hasoru nia kónjuje. Tanba ne'e prokuradór mantein nia akuzasaun no husu ba tribunál atu kondena arguidu ho pena prizaun tinan rua suspende ba tinan rua.

Iha parte seluk defeza haktuir katak arguidu konfesa fikus hotu iha akuzasaun, arrepende ona nia hahalok, foin primeiravés mai hatan iha tribunál no hakarak atu di'ak malu fali ho lezada, maibé lezada ho ninia família mak lakohi. Tanba ne'e husu ba tribunál atu aplika pena ne'ebé justu ba arguidu.

Desizaun

Depoisde avalia faktu provadu sira ne'ebé prodús durante julgamentu, tribunál konsidera akuzasaun prokuradór nian provadu hotu. Bazeia ba faktu provadu hirak ne'e no sirkunstánsia atenuante sira hotu hanesan arguidu konfesa, arrepende ona nia hahalok, tribunál konklui prosesu ne'e no kondena arguidu ho pena prizaun tinan rua suspende ba tinan rua no selu mós kustu judisiál US\$20.00.

22. Krime furtu agravadu

Nú. Prosesu	: 0011/18. VQSIC
Kompozisaun Tribunál	: Singular
Juis	: Dr. Hugo da Cruz Pui Dr. Antonio Fernandes Dr. Jose Quintão
Prokuradór	: Dr. Domingos Goveia Barreto
Defeza	: Dr. Jose M. Guterres
Tipu pena	: Absolve

Iha 21 Novembru 2018, Tribunál Distritál Baucau prezide julgamentu leitura sentensa ba krime furtu agravadu ne'ebé envolve arguidu Filomino Soares, Martino Soares Moruk, Guilermino Fatima no Rozito Gomes hasoru lezadu Marcelo da Silva Misquita, iha Suku Lugas, Sub-distritu Viqueque, Distritu Viqueque.

Akuzasaun Prokuradór

Prokuradór akuza katak loron no fulan ne'ebé la apuradu, maibé iha tinan 2012 lezadu nia karau hamutuk hitu nulu resin husik iha areia Watumumu, Sakunar no Walakatula. Iha fulan Agostu 2014 ema deskuñesidus na'ok lezadu nia karau hamutuk 32.

Iha 29 Dezembru 2014, lezadu ho nia maluk sira buka lezadu nia karau ne'ebé lakon no konsege hetan arguidu ho nia maluk sira oho lezadu nia karau ida no tamun hela iha ahi no balu habai iha hadak leten. Arguidu sira tunu mós karau nia kulit no ruin. Kada karau ne'ebé lakon ho valór osan US\$500.00 – US\$ 600.00.

Prokuradór akuza arguidu sira kontra artigu 252 alinea 1 Kódigu Penál kona-ba krime furtu agravadu ho nia moldura penal tinan 2 to'ó tinan 8.

Produsaun ba prova sira

Iha prosesu julgamentu, arguidu Filomino Soares, Martino Soares Moruk, Guilermino Fatima no Rozito Gomes deklara katak momentu sira nain haat hamutuk mak ba kasa to'ó iha areia Luahira hetan karau ka fuik ida no arguidu Guilemino Fatima mak tuda ho diman dala ida kona iha parte kabun. Maibé karau ne'e sei bele halai arguidu sira lori asu kontinua duni to'ó tuku 14.00 hafoin toman karau ne'e iha areia Watumumu no arguidu sira oho no kua kedas iha fatin refere, tamun, habai iha hadak leten, no tunu kulit no ruin. Iha tuku 16.00 lokraik hafoin lezadu ho nia maluk sira hetan arguidu sira no lezadu dehan ba arguidu sira katak arguidu sira na'ok ona lezadu nia karau, agora ba hasoru ami nia xefe aldeia. Arguidu sira mós konkorda hodi ba iha xefe aldeia Buanurak haruka arguidu sira apresenta an iha polísia.

Iha parte seluk, lezadu konfirma faktus hotu iha akuzasaun no deklara katak lezadu nia karau la tau sinal no iha areia Watumumu ne'e ema barak nia karau mak husik iha fatin refere.

Testemuña Amaro Sousa P. nu'udar lezadu nia primu depoimenta katak hamutuk ho lezadu ba buka karau, sira haree ba ahi suar iha ai laran ne'e mak sira ba haree, arguidu sira tamun hela na'an, tunu mutuk kulit no ruin. Tanba ne'e mak lezadu ho testemuña sira diside lori arguidu sira ba apresenta iha xefe aldeia Buanurak.

Testemuña Armando da Silva Mesquita nu'udar lezadu nia primu mós depoimenta katak hamutuk ho lezadu ba buka karau haree ba iha ahi suar iha ai laran fuik ne'e mak lezadu ho testemuña sira ba toman arguidu sira tamun hela naan.

Alegasaun final

Prokuradór konsidera arguidu komete duni krime tuir faktu sira iha akuzasaun prokuradór tanba arguidu sira oho karau ne'ebé la'os pretense ba sira nian no lezadu mós deklarata katak maske karau la iha sinal maibé durante ne'e lezadu nia karau mak lakon bei-beik. Tanba ne'e husu ba tribunál kondena arguidu sira ho pena prizaun tinan rua suspende ba tinan rua.

Entretantu, defeza haktuir katak bazeia ba deklarasaun arguidu sira nian katak arguidu sira oho karau fuik la'os lezadu nia karau no fatin husik karau ne'e la'os lezadu nia mesak, maibe ema seluk nia mós husik iha fatin refere. La iha serteza katak karau ne'e lezadu nian. Tanba ne'e husu ba tribunál atu absolve arguidu sira husi prosesu ne'e.

Desizaun

Depoizde avalia faktus provadu sira ne'ebé produs durante julgamentu tribunál konsidera faktus hotu la provadu, tanba karau ne'ebé husik iha fatin refere la'os lezadu ninian deit, maibé ema barak mak husik karau iha fatin refere. Bazeia ba konsiderasaun ne'e tribunál konklui prosesu ne'e no absolve arguidu sira hosi prosesu ne'e.

23. Krime ofensa ba integridade fízika simples ho natureza violénsia doméstika

Nú. Prosesu	: 0006/18. BCQLC
Kompozisaun Tribunál	: Singulár
Juis	: Dr. Jose Escurial
Prokuradór	: Dra. Ivonia M. Guterres
Defeza	: Dr. Antonio Fernandes
Tipu pena	: Pena prizaun tinan 1 suspende ba tinan 1

Iha 14 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JdA hasoru nia nia feen, iha Distritu Baucau.

Akuzasaun Prokuradór

Prokuradór akuza katak, 11 Juñu 2018, tuku 20.00 kalan, arguidu ho lezada diskute malu kona-ba lezada *video call* ho mane seluk. Arguidu tuku dala barak iha lezada nia oin no isin lolon tomak no lori fiu eletrisidade baku dala barak iha lezada nia ain to'o kotuk laran nune'e lezada halai ba subar tiha. Liu tiha loron rua, iha 13 Juñu 2018, mak lezada foin ba hato'o keixa iha Eskuadra Polisia Baguia.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklarata katak arguidu hafú lezada *video call* ho mane seluk wainhira arguidu hase'e lezada, maibé lezada nega ne'e mak arguidu halo agresaun hasoru lezada. Arguidu deklarata katak foin primeiravés komete krime hasoru lezada. Arguidu arrepende ona nia hahalok no promete sei la komete tan krime ne'e iha futuru, depoisde akontesimentu ne'e, liu semana rua foin di'ak malu fali ho lezada.

Iha parte seluk lezada konfirma faktu hotu iha akuzasaun no deklarata katak di'ak malu ona ho arguidu no depoisde akontesimentu ne'e to'o agora la baku ona lezada.

Alegasaun final

Prokuradór konsidera arguidu komete duni krime tuir faktu sira iha akuzasaun bazeia ba konfisaun arguidu nian no deklarasaun lezada nian. Tanba ne'e atu evita krime hanesan akontese tan iha futuru, husu ba tribunál atu kondena arguidu ho pena prizaun tinan ida suspende ba tinan tolu.

Entretantu, defeza husu ba tribunál atu aplika pena ne'ebé adekua ba arguidu ho konsiderasun sira katak, arguidu konfesa, arrepende ona nia hahalok no promete sei la komete tan krime hanesan iha futuru.

Desizaun

Depoisde avalia faktu provadu sira ne'ebé produs durante julgamentu, tribunal konsidera faktu hotu provadu. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun tinan ida suspende ba tinan ida no selu mós kustu judisiál US\$10.00.

24. Krime ofensa ba integridade fízika simples ho natureza violénsia doméstika

Nu. Prosesu	: 0018/18.BCLAG
Kompozisaun Tribunál	: Singular
Juis	: Dra. Ersilia de Jesus
Prokuradór	: Dr. Luis H. Rangel da Cruz
Defeza	: Dr. Antonio Fernandes
Tipu pena	: Pena prizaun fulan 4 suspende ba tinan 1 fulan 4

Iha 23 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RBB hasoru nian feen, Iha Distritu Baucau.

Akuzasaun Prokuradór

Prokuradór akuza katak, iha 22 Juñu 2018, tuku 12.00 meudia, arguidu ho lezada diskute malu kona-ba lezada baku sira nia oan ne'ebé sei ki'ik, nune'e arguidu tebe dala barak iha lezada nian

kotuk laran no rezulta lezada monu no liman kona ba iha armariu hetan kanek iha liman. Lezada tenta hamrik fali arguidu basa tan dala ida iha lezada nia kanuruk.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu, arguidu konfesa integralmente ba faktu hotu iha akuzasaun, deklara katak arrepende ona nia hahalok, diak malu ona ho lezada no promete sei la komete tan krime hasoru membru família ka ema seluk. Aleinde ne'e lezada mós kontinua konfirma faktus sira iha akuzasaun no deklara katak akontese to' o agora arguidu la baku ona lezada.

Alegasaun final

Prokuradór konsidera arguidu komete duni krime tuir faktu sira iha akuzasaun prokuradór nian. Tanba ne'e atu prevene krime ne'e akontese tan iha futuru, husu ba tribunál atu kondena arguidu ho pena prizaun fulan haat suspende ba tinan ida.

Entretantu, defeza husu ba tribunál atu aplika pena ne'ebé adekua ba arguidu ho konsiderasun sira katak, arguidu konfesa, arrepende ona nia hahalok no promete sei la komete tan krime hanesan iha futuru.

Desizaun

Depoizde avalia faktu provadu sira ne'ebé prodús durante julgamentu tribunál konsidera arguidu provadu komete krime hasoru lezada. Bazeia ba faktu provadu sira ne'e no konsidera mós sirkunstánsia atenuante sira hanesan arguidu konfesa arrepende ona nia hahalok, nune'e tribunál konklui prosesu ne'e no kondena arguidu ho pena prizaun fulan haat suspende ba tinan ida fulan haat no selu kustu judisiál US\$10.00

25. Krime ofensa ba integridade fizika simples ho natureza violénsia doméstika

Nú. Prosesu	: 0054/17.LASIC
Kompozisaun Tribunál	: Singulár
Juis	: Dr. Afonso Carmona
Prokuradór	: Dra. Ivonia M. Guterres
Defeza	: Dr. Gregorio de Lima
Tipu pena	: Pena prizaun fulan neen suspende ba tinan ida

Iha 27 Novembru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu EMM hasoru nia feen, iha Distritu Lautem.

Akuzasaun prokuradór

Prokuradór akuza katak 13 Outubro 2017, arguidu tuku dala ida iha lezada nia matan fukun parte karuk no rezulta lezada sofre kanek iha lezada nia matan fukun no lezada nia familia konsege lori lezada ba ospital no suku pontu ida.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu deklara katak arguidu halo agresaun hasoru lezada, tanba lezada les hotu arguidu nia dokumentus eskola nian iha pasta laran inklui arguidu nia *skripsi*. Maibé arguidu deklara katak nia arrepende ona nia hahalok. Depoisde akontesimentu ne'e arguidu hakarak diak malu fali ho lezada, maibé lezada ho familia mak lakohi. Arguidu foin primeiravés mai hatan iha tribunál no promete sei la komete tan krime hanesan hasoru lezada iha futuro. Iha parte seluk lezada konfirma faktus hotu iha akuzasaun no deklara katak depoisde akontesimentu ne'e sira separa ona.

Alegasau final

Prokuradór konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada, nune'e atu prevene krime ne'e akontese tan iha futuro. Tanba ne'e husu ba tribunál atu kondena arguidu ho pena prizaun fulan neen no suspende ba tinan ida.

Enkuantu defeza haktuir katak arguidu konfesa faktus hotu iha akuazasaun, arrepende ona nia hahalok, diak malu ona ho lezada. Tanba ne'e husu ba tribunál aplika pena ne'ebé adekuadu ba arguidu.

Desizaun

Depoisde avalia faktus provadu sira ne'ebé produs durante julgamentu, tribunal konsidera arguidu provadu komete krime hasoru lezada no agresaun arguidu nian lezada tenke halo tratamentu iha ospital no suku pontu ida. Tribunál konklui prosesu ne'e no kondena arguidu ho pena prizaun fulan neen suspende ba tinan ida.

26. Krime maus tratus ba menór

Nú. Prosesu	:0013/17. VQSIC
Kompostu Tribunal	: Koletivu
Juis	: Dra. Ersilia de Jesus Dr. Afonso Carmona Dr. Jose Escurial
Prokuradór	: Dr. Domingos Goveia Barreto

Defeza : Dr. Jose M. Guterres
Tipu pena : Pena prizaun tinan tolu suspende ba tinan tolu

Iha 29 Novembru 2018, Tribunál Distritál Baucau prezide julgamentu leitura akordaun ba krime maus tratus ba menór ne'ebé envolve arguidu HdS hasoru nia oan ho idade 17, iha Distritu Viqueque.

Akuzasaun Prokuradór

Prokuradór akuza katak iha 23 Marsu 2017, wainhira fila hosi eskola, sei tuur halimar iha nia tiu ni uma hodi konversa. Lezada nia primu informa ba lezada katak “*ó nia pai siak loos.*” Depoide rona tiha informasaun ne'e, lezada fila kedas ba uma. Bainhira to'o iha uma, arguidu tolok lezada no lori au-maran baku dala rua iha lezada nia kabaas parte loos no baku dala ida iha lezada nia kidan parte kotuk. Arguidu nia agresaun ne'e halo lezada tauk no halai tiha ba nia tiu nia uma, maibé to'o iha dalan klaran lezada monu tanba lakon konsiente (*dezmaia*).

Prokuradór akuza arguidu kontra artigu 155 Kódigu Penál kona-ba krime maus tratus ba menór ho nia moldura penal tinan 2 to'o tinan 6 konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa integralmente faktus hotu iha akuzasaun. Arguidu deklara katak arrende ona nia hahalok no foin primeiravés mai hatan iha tribunál. Iha parte seluk lezada konfirma faktu hotu iha akuzasaun no lezada mós deklara katak arguidu sempre halo agresaun hasoru lezada.

Alegasaun finál

Prokuradór husu ba tribunál atu kondena arguidu ho pena prizaun tinan tolu no suspende ba tinan tolu, tanba konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada.

Enkuantu defeza haktuir katak arguidu konfesa faktus hotu iha akuzasaun, arrende ona nia hahalok, foin primeiravés mai hatan iha tribunál no diak malu ona ho lezada. Tanba ne'e husu ba tribunál atu aplika pena ne'ebé adekua ba arguidu.

Desizaun

Depoide avalia faktus provadu sira ne'ebé prodús durante julgamentu tribunál konsidera akuzasaun prokuradór nian provadu hotu. Bazeia ba faktu provadu sira ne'e no konsidera mos sirkunstánsia atenuante sira, hanesan arguidu konfesa, arrende ona nia hahalok no foin primeiravés mai hatan iha tribunál, nune'e tribunál kondena arguidu ho pena prizaun tinan tolu suspende ba tinan tolu no selu mós selu kustu judisiál US\$20.00.

27. Krime ofensa ba integridade fizika simples ho natureza violénsia doméstika

Nú. Prosesu : 0036/17. BCSIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Gustavo M. da Silva
Defeza : Dr. Sidonio M. Sarmiento
Tipu pena : Pena prizaun tinan ida suspende ba tinan rua

Iha 29 Novembru 2018 , Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AJdC hasoru nia feen, iha Distritu Baucau.

Akuzasaun Prokuradór

Prokuradór akuza katak iha 6 Juñu 2017, tuku 1.00 madrugada, arguidu ho lezada diskute malu wainhira arguidu han hela no eletrisidade mate. Lezada lori arguidu nia telefone mak leno ba arguidu derepente iha mensagen hosi feto seluk tama iha arguidu nia telefone no lezada husu kona-ba mensagem ne'e, nune'e arguidu foti bikan tuda lezada, maibé lakona, arguidu kontinua kaer lezada nia kakorok no riba lezada ba rai no arguidu nia liman kukun kona iha lezada nia kakorok no matan karuk no rezulta lezada sofre kanek iha kakorok no matan.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktus hotu iha akuzasaun, arrepende ona nia hahalok no promete ba tribunál sei halo tan kualker krime hasoru membru familia iha futuru, no diak malu ona ho lezada. Iha parte seluk lezada konfirma faktus hotu iha akuzasaun, lezada mós deklara katak diak malu ona ho arguidu no agora dadaun moris hamutuk fali hanesan feen ho laen.

Alegasaun finál

Prokuradór husu ba tribunál atu kondena arguidu tuir konviksaun tribunál nian, tanba konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada.

Enkuantu, defeza husu ba tribunál atu fõ pena ne'ebé kmaan ba arguidu, tanba haree ba sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál no arguidu diak malu ona ho lezada.

Desizaun

Depoizde avalia faktus provadu sira ne'ebé produs durante julgamentu tribunal konsidera akuzasaun prokurador nian provadu hotu. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun tinan ida suspende ba tinan rua no selu mós kustu judisiál US\$40.00

Ba informasaun liután bele kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
info@jsmp.tl